

Sarajevo, 04.12.2012. godine
Broj: 746/12

ZAPISNIK I ZAKLJUČCI
SA DVADESETE SJEDNICE PREDSDJEDNIŠTVA SKUPŠTINE
SAVEZA OPĆINA I GRADOVA FEDERACIJE BIH

U Sarajevu je dana 04.12.2012. godine održana Dvadeseta sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Skupštine Saveza prisustvovali su:

1. **g-din Husejin Smajlović**, načelnik Općine Zenica
2. **g-din Advan Akeljić**, načelnik Općine Vitez
3. **g-din Hajrudin Hadžidedić**, načelnik Općine Odžak
4. **g-din Salem Dedić**, načelnik Općine Jablanica
5. **g-din Muhamed Ramović**, načelnik Općine Goražde
6. **g-din Rasim Omerović**, načelnik Općine Kalesija
7. **g-din Luka Čelan**, načelnik Općine Livno
8. **g-din Senaid Memić**, načelnik Općine Ilidža
9. **g-din Miroslav Živanović**, zamjenik gradonačelnika, Grad Sarajevo
10. **g-din Suad Omerašević**, načelnik Općine Zavidovići
11. **g-đa Dragana Solaković**, pomoćnik gradonačelnika, Grad Sarajevo.

Pored gore navedenih, sjednici su prisustvovali i: **g-din Ivo Jerkić**, načelnik Općine Čitluk, **g-đa Vesna Travljanin**, direktor Saveza, **g-din Michael Palmbach**, vođa projekta „Jačanje kapaciteta saveza općina i gradova u Bosni i Hercegovini“ – CDMA, **g-đica Bojana Sekulić**, projekt menadžer projekta „Jačanje kapaciteta saveza općina i gradova u Bosni i Hercegovini“ – CDMA, **g-đa Zlata Turkić**, viši saradnik za rad sa skupštinskim komisijama i institucijama vlasti, **g-đa Elvira Imširović-Bolić**, viši saradnik za pravna pitanja, **g-đa Dženita Kovačević**, viši saradnik za finansijska pitanja, **g-đa Šejla Hasić**, viši saradnik za projekte – projekt menadžer, **g-din Amir Kupusija**, viši saradnik za informisanje i odnose sa javnošću i **g-đa Selma Fišek**, viši saradnik za pravna pitanja.

G-din Husejin Smajlović pozdravlja prisutne i otvara Dvadesetu sjednicu Predsjedništva Saveza, te predlaže Dnevni red kako slijedi:

I

1. Usvajanje Zapisnika i Zaključaka sa Devetnaeste sjednice Predsjedništva Skupštine Saveza općina i gradova Federacije Bosne i Hercegovine
2. Prijedlog zakona koji bi se trebali uvrstiti u Program rada Predstavničkog doma Parlamenta Federacije BiH za 2013. godinu
Izvjestilac: Vesna Travljanin, direktor Saveza

3. Izvještaj sa Petog i Šestog sastanka Radne grupe za analizu i pripremu rješenja u oblasti pripadnosti javnih prihoda u Federaciji BiH i izradu prijedloga novog Zakona o pripadnosti javnih prihoda u Federaciji BiH
Izvjestilac: Vesna Travljanin, direktor Saveza
4. Zabilješke sa sjednica komisija:
 - a) Osmi i Deveti sjednica Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša
 - b) Trinaesta sjednica Komisije za ekonomski razvoj općina i gradova i finansije
 - c) Sedma sjednica Komisije za razvoj i unapređenje lokalne samoupraveIzvjestilac: Zlata Turkić, viši saradnik za rad sa skupštinskim komisijama i institucijama vlasti
5. Projekat „Jačanje kapaciteta saveza općina i gradova Bosne i Hercegovine“ (CDMA) Strategija razvoja usluga Saveza općina i gradova Federacije Bosne i Hercegovine
Izvjestilac: Vesna Travljanin, direktor Saveza
6. Aktivnosti na implementaciji projekta „Načelnici za razvoj“
Izvjestilac: Vesna Travljanin, direktor Saveza
7. Projekat „Sistem obuke za jedinice lokalne samouprave“ - izmjena člana Koordinacionog tijela za obuku i imenovanje predstavnika Saveza u Radnu grupu
Izvjestilac: Vesna Travljanin, direktor Saveza
8. Imenovanje predstavnika Saveza u Kongres lokalnih i regionalnih vlasti Vijeća Evrope
Izvjestilac: Vesna Travljanin, direktor Saveza
9. Imenovanje predstavnika Saveza u Radnu grupu za izradu izmjena i dopuna Zakona o principima lokalne samouprave u Federaciji Bosne i Hercegovine
Izvjestilac: Vesna Travljanin, direktor Saveza
10. Informacije o:
 - a) radionicama na temu: „Proces uvođenja trezorskog/rizničnog poslovanja u jedinicama lokalne samouprave u Federaciji Bosne i Hercegovine – razmjena iskustava“
Izvjestilac: Zlata Turkić, viši saradnik za rad sa skupštinskim komisijama i institucijama vlasti
11. Verifikacija Odluke o usvajanju Kodeksa o međupravničkim odnosima u Federaciji Bosne i Hercegovine
Izvjestilac: Vesna Travljanin, direktor Saveza
12. Odluka o sazivanju Izborne Skupštine Saveza
Izvjestilac: Vesna Travljanin, direktor Saveza

II Utvrđivanje prijedloga dokumenata za sjednicu Skupštine Saveza:

13. Izvještaj o radu Predsjedništva Skupštine Saveza općina i gradova Federacije Bosne i Hercegovine za period oktobar 2011. – decembar 2012. godine
14. Izvještaj o radu komisija Skupštine Saveza općina i gradova Federacije Bosne i Hercegovine za period oktobar 2011. – decembar 2012. godine
15. Strategija razvoja usluga Saveza općina i gradova Federacije Bosne i Hercegovine

Izjavitelj: Vesna Travljanin, direktor Saveza

16. Tekuća pitanja

Dnevni red je jednoglasno usvojen.

1. Usvajanje Zapisnika i Zaključaka sa Devetnaeste sjednice Predsjedništva Skupštine Saveza općina i gradova Federacije Bosne i Hercegovine

G-din Husejin Smajlović otvara raspravu. Nakon konstatacije da nema komentara, stavlja Zapisnik i zaključke na glasanje.

Zapisnik i zaključci sa Devetnaeste sjednice Predsjedništva Skupštine Saveza općina i gradova Federacije Bosne i Hercegovine su jednoglasno usvojeni.

2. Prijedlog zakona koji bi se trebali uvrstiti u Program rada Predstavničkog doma Parlamenta Federacije BiH za 2013. godinu

G-din Husejin Smajlović otvara raspravu i naglašava da je dostavljen materijal za ovu tačku.

G-đa Elvira Imširović-Bolić napominje da je prijedlog zakona koje je Savez dostavio Komisiji za lokalnu samoupravu Predstavničkog doma Parlamenta Federacije BiH urađen na temelju Strategije lobiranja Saveza i Plana rada Saveza za period 2011-2012 godina.

G-đa Elvira Imširović-Bolić ističe da je u međuvremenu održana sjednica Komisije za lokalnu samoupravu Predstavničkog doma Parlamenta Federacije Bosne i Hercegovine na kojoj su razmatrani i usvojeni prijedlozi za Program rada Predstavničkog doma Parlamenta Federacije BiH za 2013. godinu, a koji su Komisiji dostavljeni od strane UNDP-a, Saveza općina i gradova Federacije Bosne i Hercegovine i prof. dr. Mirka Pejanovića. Svi ovi prijedlozi će biti dostavljeni Radnoj grupi koja je zadužena za kreiranje prijedloga Programa rada Predstavničkog doma Parlamenta Federacije BiH za 2013 godinu.

G-din Husejin Smajlović predlaže da se dopis Saveza koji je poslan Komisiji proširi sa Zakonom o proglašenju gradova.

G-đa Elvira Imširović-Bolić navodi da je inicijativa za donošenje tog zakona sadržana u prijedlogu prof. dr. Mirka Pejanovića.

Prijedlog zakona koje je Savez dostavio Komisiji za lokalnu samoupravu Predstavničkog doma Parlamenta Federacije BiH, a koji bi se trebali uvrstiti u Program rada Predstavničkog doma Parlamenta Federacije BiH za 2013. godinu je jednoglasno usvojen.

3. Izvještaj sa Petog i Šestog sastanka Radne grupe za analizu i pripremu rješenja u oblasti pripadnosti javnih prihoda u Federaciji BiH i izradu prijedloga novog Zakona o pripadnosti javnih prihoda u Federaciji BiH

G-đa Vesna Travljanin podsjeća da su predstavnici Saveza u ovoj Radnoj grupi bili g-din Hakija Osmić i g-din Emir Dedović, da je održano 6 sastanaka, te da su postignuti određeni rezultati. Naglašava da na svim sastancima nisu mogli prisustvovati imenovani predstavnici Saveza, ali da su ona i g-đa Dženita Kovačević prisustvovala svim sastancima Radne grupe.

G-đa Dženita Kovačević naglašava da će se izmjenama zakona povećati prihodi od poreza na dohodak za jedinice lokalne samouprave i da će Grad Sarajevo i općine Kantona Sarajevo sredstva dobivati direktno sa Jedinistvenog računa.

G-din Husejin Smajlović postavlja pitanje o povećanju prihoda od PDV-a.

G-đa Dženita Kovačević navodi da je na prvom sastanku Radne grupe istaknuto da se neće ulaziti u izmjene vertikalne raspodjele. Također, navodi da se u okviru rada Radne grupe razmatrala problematika otplate vanjskog duga, te da se u praksi dešava da jedinice lokalne samouprave otplaćuju vanjski dug koji je uglavnom dug Federacije BiH, pa se to pokušalo izmjeniti, te da je Savez radio određene analize. Radna grupa je zaključila da se inicijativa u vezi sa rješanjem pitanja otplate vanjskog duga mora uputiti prema Vladi Federacije BiH. Podsjeća da je Predsjedništvo Saveza na sjednici u Mostaru zaključilo da se ide sa urgencijom u vezi s tim, ali da se međutim do danas ništa nije dogodilo.

G-din Ivo Jerkić konstatuje da treba tražiti da se jedinice lokalne samouprave izuzmu od otplate vanjskog duga. Naglašava da se kroz kreditna zaduženja zadužuje Federacija BiH, a taj dug vraćaju i jedinice lokalne samouprave i da se ukupna masa za jedinice lokalne samouprave smanjuje.

G-đa Dženita Kovačević navodi da će prema procjenama jedinice lokalne samouprave od stand by aranžana sa Međunarodnim monetarnim fondom izgubiti 40 miliona KM.

G-din Husejin Smajlović ističe da se, ako je potrebno, treba pokrenuti ustavni spor.

G-đa Dženita Kovačević predlaže da Predsjedništvo Saveza izade sa zaključkom kojim će se tražiti da se jedinice lokalne samouprave izuzmu od otplate duga prema Međunarodnom monetarnom fondu.

G-din Husejin Smajlović ističe da se trebaju odrediti predstavnici Saveza koji će ići na razgovore u Federalno ministarstvo finansija.

G-đa Vesna Travljanin naglašava da je dobro što nas Federalno ministarstvo finansija kroz rad Radne grupe sve više uvažava.

G-din Ivo Jerkić smatra da će svi proračuni ubuduće biti manji zbog otplate vanjskog duga.

G-din Rasim Omerović ističe da pare nisu nikada bile transparentne i da nas interesuje dio koji se sa državnog nivoa šalje na Federaciju, a onda se dijeli u skladu sa zakonom.

G-din Ivo Jerkić naglašava da ne znamo šta je glavica.

G-din Rasim Omerović ističe da je nama bitno da nam se ne izdvaja obaveza iz dijela koji ide direktno od države i da mi samo tražimo dosljednu primjenu zakona.

Predsjedništvo Saveza je jednoglasno usvojilo izvještaje sa Petog i Šestog sastanka Radne grupe za analizu i pripremu rješenja u oblasti pripadnosti javnih prihoda u Federaciji BiH i izradu prijedloga novog Zakona o pripadnosti javnih prihoda u Federaciji BiH uz zaključak da se odrede predstavnici Saveza koji će zastupati Savez u razgovorima sa predstavnicima Federalnog ministarstva finansija, te je zaključeno da jedinice lokalne samouprave moraju dobiti procenat od 8,42 sa Jedinistvenog računa prije otplate vanjskog duga.

4. Zabilješke sa sjednica komisija:

- a) **Osma i Deveta sjednica Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša**
- b) **Trinaesta sjednica Komisije za ekonomski razvoj općina i gradova i finansije**
- c) **Sedma sjednica Komisije za razvoj i unapređenje lokalne samouprave**

G-đa Zlata Turkić navodi da su Predsjedništvu dostavljene zabilješke sa ovih sastanaka, te naglašava da Savez ima tri predstavnika u Radnoj grupi za izradu Zakona o premjeru i katastru nekretnina koja je formirana od strane Vlade Federacije BiH. Dalje navodi da je GAP puno radio u oblasti prostornog planiranja, da Savez nije bio uključen u te aktivnosti, ali da će Savez jedinicama lokalne samouprave dostaviti vodič koji je Savez dobio od GAP-a.

G-đa Dženita Kovačević izvještava o sjednici komisije, a u vezi sa Zakonom o izmjenama i dopunama Zakona o raspodjeli javnih prihoda, te navodi da se sa stavom komisije išlo na Peti sastanak Radne grupe o kojem je već izvjestila pod tačkom 3.

G-đa Zlata Turkić ističe da su se članovi komisije telefonski izjasnili u vezi sa tačkom 4. c), obzirom da je u pitanju bila samo jedna inicijativa i to Inicijativa Općine Olovo za zaštitu prava na lokalnu samoupravu u vezi sa Zakonom o zdravstvenoj zaštiti u Federaciji BiH u kojoj se tražila podrška Saveza općina i gradova Federacije BiH u ovom predmetu, te naglašava da su članovi komisije jednoglasno podržali ovu inicijativu. Također, navodi da je Ustavni sud Federacije BiH u međuvremenu donio presudu u korist Općine Olovo.

Predsjedništvo Saveza je jednoglasno prihvatilo zabilješku sa sjednice Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša, Komisije za ekonomski razvoj općina i gradova i finansije i Komisije za razvoj i unapređenje lokalne samouprave.

5. Projekat „Jačanje kapaciteta saveza općina i gradova Bosne i Hercegovine“ (CDMA) Strategija razvoja usluga Saveza općina i gradova Federacije Bosne i Hercegovine

G-đa Vesna Travljanin ističe da se ide sa drugom fazom ovog projekta, izvještava da je došlo do personalnih promjena i predstavlja g-dina Michaela Palmbacha, novog tim lidera, te navodi da je izvršena evaluacija dosadašnje implementacije projekta. Također, naglašava da se Savez sve više nastoji profilirati kao organizacija koja pruža usluge jedinicama lokalne samouprave i da su uvedeni novi servisi Saveza i to pravno i finansijsko savjetovalište.

G-din Miroslav Živanović ističe da je razvijanje Saveza dobro i zahvaljuje se svima u Savezu koji rade i djeluju u ovom pravcu i smatra da je Savez na dobrom putu.

Predsjedništvo Saveza je jednoglasno primilo k znanju informaciju o Projektu „Jačanje kapaciteta saveza općina i gradova Bosne i Hercegovine“ i usvojilo Strategiju razvoja usluga Saveza općina i gradova Federacije Bosne i Hercegovine.

6. Aktivnosti na implementaciji projekta „Načelnici za razvoj“

G-din Amir Kupusija izvještava o ovom projektu i navodi da je projekat pokrenut u junu ove godine zajedno sa Savezom opština i gradova Republike Srpske, da za cilj ima unapređenje zakonodavstva u BiH, te da je projekat finansijski podržan od strane Švicarske agencije za razvoj i saradnju. Nabroja zakone koji se kroz projekat trebaju izraditi i to: Zakon o finansiranju nerazvijenih općina, Zakon o međuopćinskoj saradnji, Zakon o zaštiti i spašavanju i ističe da imamo šest načelnika koji će promovisati ove zakone i lobirati za njihovo usvajanje. Ističe da će u aprilu naredne godine biti izrađeni prvi tekstovi zakona, te da će svi imati mogućnost da kroz javne rasprave daju komentare na iste.

Predsjedništvo Saveza je primilo k znanju informaciju o aktivnostima na implementaciji projekta „Načelnici za razvoj“.

7. Projekat „Sistem obuke za jedinice lokalne samouprave“ - izmjena člana Koordinacionog tijela za obuku i imenovanje predstavnika Saveza u Radnu grupu

G-đa Vesna Travljanin ističe da je ovo projekat koji se radi sa UNDP-om i da je po Strategiji obuke Savez nadležan za obuku izabranih zvaničnika, a Agencija za državnu službu Federacije BiH za obuku državnih službenika i namještenika.

G-đa Šejla Hasić naglašava da je Savez u fazi pripreme obuka za novoizabrane vijećnike u skladu sa usvojenom Strategijom obuke, te ističe da je potrebno da Predsjedništvo imenuje novog člana u Koordinaciono tijelo za obuku umjesto g-dina Džavida Aličića.

G-đa Vesna Travljanin dodaje da smo u dogovoru sa predsjednikom kontaktirali g-dina Edina Smajlića.

G-đa Šejla Hasić navodi da se trebaju imenovati i članovi za radnu grupu koja će raditi na pitanjima finansijske održivosti sistema obuke, te da bi to trebali biti po jedan predstavnik male, srednje i velike općine uz predstavnike Saveza i Agencije za državnu službu Federacije BiH.

G-din Husejin Smajlović predlaže da se ovo ostavi za slijedeću sjednicu Predsjedništva.

G-din Miroslav Živanović iznosi prijedlog da se proces imenovanja predstavnika Saveza u određena tijela mora maksimalno uozbiljiti kako bi se dobili motivirani i stručni ljudi.

G-đa Vesna Travljanin naglašava da imamo Komisiju za izbor i imenovanja i da smo vezani rokom, ali smatra da je g-din Miroslav Živanović definitivno u pravu. Predlaže da se ostavi rok od tri dana pa da Komisija za izbor i imenovanja odredi kandidate.

G-đa Zlata Turkić ističe da Savez treba insistirati da nam predlagači zakona i drugih propisa daju duže rokove.

G-din Husejin Smajlović naglašava da niko ne želi preuzeti odgovornost i da se treba ovlastiti Komisija za izbor i imenovanja da prikupi prijedloge od općina i predloži kandidate Predsjedništvu na usvajanje.

Predsjedništvo Saveza je jednoglasno usvojilo zaključak da Komisija za izbor i imenovanja pripremi prijedloge kandidata i da Predsjedništvo imenuje kandidate na slijedećoj sjednici Predsjedništva. Također je zaključeno da isti princip vrijedi i za tačke 8. i 9. Dnevnog reda (Imenovanje predstavnika Saveza u Kongres lokalnih i regionalnih vlasti Vijeća Evrope i imenovanje predstavnika Saveza u Radnu grupu za izradu izmjena i dopuna Zakona o principima lokalne samouprave u Federaciji Bosne i Hercegovine).

10. Informacije o:

a) radionicama na temu: „Proces uvođenja trezorskog/rizničnog poslovanja u jedinicama lokalne samouprave u Federaciji Bosne i Hercegovine – razmjena iskustava“

G-đa Zlata Turkić izvještava o održanim radionicama i navodi da su neke općine poodmakle u uvođenju trezorskog poslovanja, a da su neke na početku.

G-din Husejin Smajlović aktuelizira pitanje provedbe Zakona o zaštiti i dobrobiti životinja.

G-din Rasim Omerović misli da nas niko neće dirati u vezi sa trezorskim poslovanjem. Ističe da u trezoru nema minusa nego se dijeli onoliko koliko ima para i da se Savez ovim ne treba baviti. Dalje smatra da je Zakon o zaštiti i dobrobiti životinja vjerovatno prepisan i da nije provodiv.

G-din Salem Dedić naglašava da se priča o trezoru.

G-din Husejin Smajlović naglašava da se i dalje treba raditi na obuci za trezor.

Predsjedništvo Saveza je primilo k znanju informaciju o radionicama na temu „Proces uvođenja trezorskog/rizničnog poslovanja u jedinicama lokalne samouprave u Federaciji Bosne i Hercegovine – razmjena iskustava“, te je zaključeno da Savez u vezi sa Zakonom o zaštiti i

dobrobiti životinja, od nadležnih organa zatraži informaciju o realizaciji zaključaka upućenih od strane Saveza.

11. Verifikacija Odluke o usvajanju Kodeksa o međupravničkim odnosima u Federaciji Bosne i Hercegovine

G-đa Vesna Travljanin ističe da nam je vrlo bitno da se potpiše Kodeks o međupravničkim odnosima u Federaciji BiH koji je Vlada Federacije BiH usvojila u septembru, podsjeća da je na Skupštini Saveza održanoj prošle godine potpisan Sporazum o saradnji između Vlade Federacije BiH i Saveza. Navodi da u ljetnim mjesecima nije bilo sjednica Predsjedništva, pa je predsjednik Predsjedništva Saveza g-din Vlado Alilović potpisao Kodeks, te da danas očekujemo dolazak federalnog premijera kako bi potpisao Kodeks u ime Vlade Federacije BiH..

G-din Salem Dedić ističe nezadovoljstvo potpisanim Sporazumom i postavlja pitanje šta Savez ima od toga.

G-đa Vesna Travljanin navodi da je došlo do pomaka, s obzirom na činjenicu da nas viši nivoi vlasti sada više uvažavaju, slaže se da to nije na zadovoljavajućem nivou, te ističe da se Savez izborio da ima svoje predstavnike u radnim grupama za izradu određenih zakona, kao što su npr. Zakon o raspodjeli javnih prihoda, Zakon o premjeru i katastru nekretnina, Zakon o koncesijama.

G-din Husejin Smajlović ističe da je na prošlogodišnjoj Skupštini Saveza premijeru rečeno da imamo 60 zakona gdje nisu konsultovane jedinice lokalne samouprave i navodi da bi možda bilo dobro da iduće rukovodstvo Saveza pokrene tužbe pred Ustavnim sudom za svih 60 zakona.

G-din Rasim Omerović naglašava da trebamo potpisati Kodeks iako nećemo imati koristi od toga, jer vlada bezakonje. Smatra da novi saziv Predsjedništva Saveza treba ići sa tužbama preko Ustavnog suda. Ističe da Savez nije saradivao sa Vladom Federacije BiH i da moramo biti agresivniji prema njima i tražiti da ozbiljno rade i da nas više uvažavaju.

G-din Ivo Jerkić također smatra da trebamo tražiti od Vlade Federacije BiH da nas što više uvažavaju.

Predsjedništvo Saveza je jednoglasno prihvatilo Odluku o usvajanju Kodeksa o međupravničkim odnosima u Federaciji Bosne i Hercegovine.

12. Odluka o sazivanju Izborne Skupštine Saveza

G-din Husejin Smajlović postavlja pitanje u vezi sa mjestom održavanja sjednice Izborne Skupštine Saveza.

G-đa Vesna Travljanin naglašava da je prijedlog da se sjednica Skupštine Saveza održi u Fojnici 06.02.2013. godine, te navodi da je potrebno da se u januaru održi još jedna sjednica Predsjedništva Saveza na kojoj bi se utvrdili prijedlozi kandidata za organe i tijela Saveza i ističe da je produžen rok za predlaganje kandidata do 22. decembra 2012. godine.

G-din Rasim Omerović naglašava da moramo imati pravila u vezi sa organizovanjem sastanaka na kojima se predlažu kandidati za organe i tijela Saveza i da ih se moramo pridržavati. Smatra da nije u redu što je g-din Jasmin Imamović sazvao sastanak za petak u 12.00 sati i postavlja pitanje ko treba prisustvovati tim sastancima.

G-din Ivo Jerkić predlaže da članovi Predsjedništva Saveza održe te sastanke.

G-din Miroslav Živanović smatra da se treba staviti na papir ono što je ustanovljena praksa, te se pridržavati tih pravila.

G-din Rasim Omerović konstatuje da je problem to što nemamo pravila u vezi sa ovim pitanjem.

G-din Miroslav Živanović navodi da se treba uraditi Pravilnik.

G-din Husejin Smajlović ističe da je potrebno odredbe iz Statuta staviti na papir.

G-din Rasim Omerović također smatra da nam trebaju pravila o tome kako se biraju predstavnici iz kantona u organe i tijela Saveza.

G-din Suad Omerašević smatra da postojeći članovi Predsjedništva Saveza trebaju sazivati ove sastanke.

Predsjedništvo Saveza je usvojilo Odluku o sazivanju Izborne Skupštine Saveza u skladu s kojom će se sjednica Izborne Skupštine održati 06.02.2013. godine u Fojnici.

Predsjedništvo Saveza je usvojilo i slijedeće zaključke:

- **svim jedinicama lokalne samouprave uputiti dopis sa odredbama iz Statuta Saveza koje se odnose na to ko predstavlja jedinice lokalne samouprave u Skupštini Saveza. Sastanke jedinica lokalne samouprave za područja svakog kantona organizuju članovi Predsjedništva Saveza, uz napomenu da jedinice lokalne samouprave koje su već provele proceduru predlaganja kandidata u organe i tijela Saveza nisu dužne istu ponavljati;**
- **izraditi Pravila i procedure u vezi sa organizacijom kantonalnih sastanaka i predlaganjem kandidata u organe i tijela Saveza za slijedeće izbore.**

II Utvrđivanje prijedloga dokumenata za sjednicu Skupštine Saveza:

13. Izvještaj o radu Predsjedništva Skupštine Saveza općina i gradova Federacije Bosne i Hercegovine za period oktobar 2011. – decembar 2012. godine
14. Izvještaj o radu komisija Skupštine Saveza općina i gradova Federacije Bosne i Hercegovine za period oktobar 2011. – decembar 2012. godine
15. Strategija razvoja usluga Saveza općina i gradova Federacije Bosne i Hercegovine

Predsjedništvo Saveza je usvojilo zaključak da se tačka Dnevnog reda „Utvrđivanje prijedloga dokumenata za sjednicu Skupštine Saveza“ ostavi za narednu sjednicu Predsjedništva na kojoj će se utvrđivati i prijedlozi kandidata za organe i tijela Saveza.

16. Tekuća pitanja

G-din Senaid Memić pod tekućim pitanjima ističe pitanja: vodovoda, plina, željeznica i Roma. Naglašava da ima osam porodica Roma koje želi da smjesti, međutim, svi se dignu protiv smještaja tih ljudi, te se miješaju i firme, tako što su „Željeznice“ odbile da daju saglasnost, „Sarajevogas“, također. Smatra da se Savez treba oglasiti i dići protiv toga.

G-din Husejin Smajlović ističe da je i on imao problem sa romskom populacijom i da ga je riješio.

Zaključeno je da g-din Senaid Memić pošalje Savezu inicijativu u vezi sa ovim pitanjem.

G-din Senaid Memić navodi da Savez mora imati bazu podataka osoba sa međunarodnim iskustvom, tj. onih koji govore strane jezike, a u vezi sa tačkom 8.

G-din Husejin Smajlović naglašava da je iz tog razloga tačka 8. i ostavljena za narednu sjednicu Predsjedništva.

G-din Senaid Memić navodi da je prisustvovao sastanku Turske asocijacije općina održanom u Ankari gdje je dobio prijedlog da Općina Ilidža bude domaćin međunarodne konferencije za načelnike koja bi se trebala održati u mjesecu avgustu naredne godine i na kojoj bi bilo prisutno oko četiri stotine

načelnika, te naglašava da je prednost konferencije što bi na njoj moglo prisustvovati trideset načelnika sa Kosova. Smatra da imamo priliku da i naš Savez bude aktivan učesnik te konferencije, te da na istoj treba razgovarati o projektima.

G-din Ivo Jerkić ističe da ima problem sa EIB-om (Evropska investicijska banka), da je šest općina potpisalo ugovore, a da ih je u projektu dvadeset, te da se projekat koči. Naglašava da će dostaviti Savezu saglasnost šest općina koje su spremne kako bi Savez tome dao podršku i uputio je prema Federalnom ministarstvu poljoprivrede, vodoprivrede i šumarstva.

G-din Husejin Smajlović ističe da je Savez danas na jednom višem nivou nego što je bio kada je on preuzeo dužnost predsjednika Predsjedništva, zahvaljuje se svima i želi uspjeh u radu novom sazivu Predsjedništva, te smatra da Savez može i dalje jačati.

G-din Miroslav Živanović se također zahvaljuje na prilici da bude član ovog tijela i čestita predsjedniku na dobrom vođenju Predsjedništva kao i novoizabranim načelnicima.

G-din Ivo Jerkić zahvaljuje direktorici i Stručnoj službi Saveza.

G-đa Vesna Travljanin ističe da je potrebno odrediti predstavnike Saveza koji će na Parlamentu braniti rješenja iz Zakona o zaposlenicima u organima jedinica lokalne samouprave.

G-đa Elvira Imširović-Bolić naglašava da smo dobili negativna mišljenja iz kantona na Zakon o zaposlenicima u organima jedinica lokalne samouprave, a da smo zamolili načelnike da lobiraju u svojim kantonima za pozitivno mišljenje.

Predsjedništvo Saveza je usvojilo zaključak da su predstavnici Saveza koji će na sjednici Parlamenta Federacije BiH braniti rješenja iz Zakona o zaposlenicima u organima jedinica lokalne samouprave: g-din Ivo Jerkić, g-din Husejin Smajlović, g-din Predrag Šupljeglav i g-din Selver Keleštura.

Nakon što je konstatovano da su sve tačke Dnevnog reda iscrpljene, g-din Husejin Smajlović zatvara Dvadesetu sjednicu Predsjedništva Saveza u 17:10 sati.

Zamjenik predsjednika Predsjedništva Skupštine Saveza
Husejin Smajlović, s.r.